

〔日本紀略桓武〕延曆廿年五月甲戌詔諸國調庸入貢而或川無橋或津乏船民憂不少令路次諸國貢調之時津濟之處設舟楫浮橋等長為恒例

〔日本後紀平城十四〕大同元年七月乙未勅關津之制為察衆違苟有阿容何設朝憲今聞長門國司勘過失理衆庶嗷嗷自今以後不得更然若有違犯特寔重科

〔類聚三代格十二〕太政官符

應禁止強雇往還人并車馬事

右檢案內略中近者山崎大津兩津頭邊諸司諸家人妄假威勢強雇車馬因茲行旅之人多煩往還備賃之輩已失活計人民之間愁苦不少此而不糾何謂皇憲中納言從三位兼行左近衛大將藤原朝臣基經宣自今而後一切禁斷若有強雇者重禁其身具狀言上

貞觀九年十二月廿日

〔三代實錄清和二十六〕貞觀十六年十二月廿六日庚辰檢非違使起請二條其一應糾彈近京之地非違事謹案使等依舊宣旨准檢京中之非違由是奸猾之輩好城邊之地避使等檢察亦觸類應彈之事多在山崎與渡大井等津頭使等即事經過郡邊目有所見口不能言望請津頭及近京之地○在上恐非脫所字法使等有所著即便糾彈

〔延喜式木工三十四〕凡山城國宇治津雜材直并運賃錢者五六寸步板一丈四尺柱直各卅六文簀子一丈二尺柱直各廿一文樽一材直七文自同津至前瀧津樽一材功一文半

凡近江國大津雜材直并桴功錢者五六寸步板一丈四尺柱直各卅文簀子一丈二尺柱直各十七文樽一材七文自同津至宇治津樽一樽桴功一文半

凡丹波國瀧額津雜材直并桴功錢者五六寸步板一丈四尺柱直各卅七文簀子一丈二尺柱直各廿二文樽一材直七文自同津至大井津樽一材桴功一文半